



Sabtu, 25 Maret 2023

Ogen: Lukas 1: 28



Ngaloken Pasu-pasu



Pengidah kami rusur i bas kebaktin minggu, ope denga dung kebaktin, umpaman ope entah kenca doa sapaat lit ka perpulungen e enggo mulih ku rumah. Apai ka lit lakon-lakon (kecuali LPS) asum lakon aloken/ peridin/ ngawanken nterem ka si kurang saber nimai kebaktin e itutup. Si kurang isedari perpulungen e adina mulih ia ope seh ku pemasu-masun situhuna rugi kel la ia ngaloken pasu-pasu i bas Tuhan nari, si enda pe perlu ijadiken sada kesadaren erkiniteken.

“Mejuah-juah! Tuhan kap ras kam janah enggo iberekenNa pasu-pasuNa si mbelin man bandu” kalimat si jadi ogenta sendah enda tuhu-tuhu mabai kemalemen ate man banta si ngogesa. Perkatan enda situhuna ibelasken malaikat man Maria guna mpetetap ukur Maria. I bas paksa si e situasi Maria singuda-nguda denga tapi ikataken ia natang tuah. E maka tersungkun-sungkun Maria uga maka banci bage. I bas kitab Injil nurikenca Jusup e sekalak si mehuli lagu langkahna. Jadi kai sura-sura Dibata? Tentu mereken pengangkan, ketenengen man Maria gelah tek ia nandangi sura-sura Dibata si enggo seh man bana dengen arus arah ia kin media ketubuhan juruselamat e.

Pasu-pasu Tuhan e mereken ketetapan ukur. Tuhan ras kita katawari pe (Immanuel). Amin gia lit perbeben si mberat i bas kegeluhen ola ndekah tersungkun-sungkun, si inget dengen sijemaklah pasu-pasu Tuhan e enggo seh man banta. Iperkuanken Tuhan kita, iingetkenNa maka kiniersadannta rassa mahanca kita meteguh ncikep padanna.